

Suleqatigiiffik “Atuarfimmi Timersorneq” inatsisartut aningaasanut inatsitigut allannguutissatut siunnersuuteqarneq aqputigalugu aningaasanik 1,8 mio. kr.-inik ukiumoortumik aaningaasaliiffineqartalernissaa pillugu Naalakkersuisut peqquneqarnissaannik Inatsisartut aalajangiiffisassaattut siunnersuut.

(Inatsisartunut ilaasortaq / Medlem af Inatsisartut, Malik Berthelsen Siumut)

Akissut

(Ilinniartitaanermut Ilisimatusarnermullu Nunanillu Avannarlernik suleqateqarnermut Naalakkersuisunut ilaasortaq)

Siullermeerneqarnera

Uppernarsarneqarnikuuvoq timersorneq timigissarnerlu ilikkajasunngortitsisarmat. Tamanna pillugu Naalakkersuisut siunnersuummut paasinnilluarput.

Naalakkersuisut meerartatsinnut inuusuttortatsinnullu iluaqutissanik sunilluunniik namminneerlutik kajumissutsimik pilersitsiniartunut pingaartitsisarput. Taamaammallu Naalakkersuisut pingaartitaasa ilagaat kommunit peqatigiiffiullu Atuarfimmi Timersornerup akunnerminni nunatta atuarfiini timersorneq pillugu suleqatigiinnissaq pitsaasoq aallarnisarmassuk. Tamassuma kommuneni timersoqatigiiffinnilu meeqqanut inuusuttunullu timersuutiniq neqeroorutigisartagaanut ilassutissaamat pitsaasoq.

Meeqqat Atuarfianni pinngitsoorani atuartsissutigineqartussanut Sumiiffinni toqqagassanut Timersorneq ilaavoq. Meeqqat Atuarfiat nalunngisatsitut kommuninit ingerlanneqarpoq, namminersorlutik oqartussaniit ataatsimoortumik tapiissutinit aningaasalersorneqartoq. Tamanna peqputigalugu sumiiffinni assigiinngitsuni kommunalbestyrelsit aalajangersugassaraat qanoq qanorlu atsigisumik taassuma ingerlanneqarnissaa. Tamassumalu aamma kinguneraa kommunit piunaffigineqarsinnaanngimmata peqatigiiffiit aalajangersimasut meeqqat atuarfiini sunik qanorlu annertutigisumik atussaneraat.

Atuarfimmi Timersorneq peqatigiiffiuvoq namminersortoq. Naalakkersuisut Inatsisartullu ataqquisussaavaat kommunit namminersornerat, tassalu kommunit sinnerlugit inassinnaanngilaat peqatigiiffiup aalajangersimasup atuarfinni timersornermut ilinniartitsisunulluunniit pikkorissaatissatut neqeroorutai atoqqullugit.

Atuarfimmi Timersorneq peqatigiiffittut allatullu suliariniakkaminnut tapiissutissanik qinnuteqarsinnaapput.

Taamak oqaaseqarfigalugu Naalakkersuisut siunnersuutip itigartitsissutigineqarnissaa kajumissaarutigaa.

